

摘藻堂四庫全書薈要

集部

欽定四庫全書薈要卷一萬八千三百九十六

集部

御選金詩卷十

五言律詩三

張琚

移河中

畊戰連年廢吾知
有此行條山猶在眼
渭水若為情飽
肉豺狼喜傾巢
燕雀驚西樓
今夜月愁絕是空城

秋夜

人與年華老愁兼節物雙高風梧墮砌久雨竹侵窗客
簾悲秋卧僧鐘數夜撞更堪衰鬢影蕭颯照寒缸

郭安民

題獻陵梁氏成趣圖

樂壽有高士買園鄰郡城坐尋嘉樹蔭卧聽野禽聲閒
裏書頻讀歡來酒自傾醉歌歸去曲應不愧淵明

雷淵

紫芝峪

仙徑元雲覆靈芝紫氣浮朝霞屯錦蓋春雨潤珠旒蘭
有香偏襲苔無色可侔如何采真客辟穀費冥搜

雪

風定雲仍暖天圍四顧低紛紛俄攪野浩浩欲平溪
樵擔歸時重漁舟望處迷饑鴉空遠樹若箇可安棲

劉從益

聞蛩用少陵韻

唧唧不堪聞村居更惱人青衫傷久客華髮念雙親歲

暮那逢雨秋宵未向晨石心猶可轉百感本來真

除夕用少陵韻

窗送迢迢漏燈開豔豔花正愁聞過鴈久客羨棲鴉放
眼春猶好驚心日又斜一蓑江上雨歸思浩無涯

即事

卧疾劉公幹躬畊鄭子真溪山留好客天地許閒人花
醉紅沾袖松吟翠繞身捫心無所歎持此壽吾親

張德直

叔能見過

度嶺千峰闊沿溪一徑微
山寒花發晚村迴客來稀
強飲酬佳節悲歌送夕暉
平生愛歡聚衰病與心違

周馳

鼓子

私盍反
支起也

勿以微才棄安危任不輕誰憐一片小能使四方平
几案由吾正槃盂免爾傾何當遇夷坦沈默更何營

秦略

元日

新歷從頭數殘冬與我違不知垂老至但覺拜人稀
汲水泥融井看書暖入幃淺情牆外柳新綠已依依

劉昂霄

趙村晚望

放眼東原上風煙接渺茫林疎出村落野迴散牛羊
天地浮元氣山河半夕陽登高一長嘯未覺阮生狂

孫益

送張安中還雲中

名保極雲
朔名士

相送還相送
臨分手重分
驛驢欣得路
鴻鴈惜離羣
木落黃花露
城低紫塞雲
中秋月正好
千里謾思君

麻九疇

秋望

雲氣東南壯
風煙正北長
遠人投屋小
寒草帶城荒
馬鳴便秋潦
饑牛背夕陽
閒情儘堪畫
未要雨浪浪

辛愿

亂後

兵去人歸日花開雪霽天川原荒宿草墟落動新煙困
鼠鳴虛壁饑烏啄廢田似聞人語亂縣吏已催錢

贈趙仲常

名憲宜
之從弟

趙子年雖小論詩樂最深秋風凡幾首冬日更多吟老
大吾無力文章爾用心荒山松竹底莫厭數相尋

贈劉菴主

劉遠
貴族

蚤薄軒裳貴高尋綺皓踪一囊閭里藥六尺水雲筇午

枕眠芳景晴簷望遠峰柴門常不掩應得野夫從

贈趙宜之二首

夫子今詞伯胡為遠帝京青雲無轍迹白髮有柴荆
鬼戲多年病人高四海名麟經方有缺無惜繼丘明
轉徙家無地逢迎客有尊光陰連病枕天地一愚軒
霜雪青松古風塵白壁溫從渠投隙者衮衮向金門

送裕之往許州酒間有請予歌渭城朝雨者因
及之

白酒留分袂青燈約對牀言詩真漫許知己重難忘爽
氣虛韓岳文星照許昌休歌渭城柳衰老易悲傷

張澄

積雨

積雨生頑痺新晴意自怡幽花依小徑野蔓媚疎籬
少從梳懶年衰與杖宜腐儒慚用拙糲食復何辭

王元粹

送李文起令鄜城

好去廊城宰當途有薦章長才試縣邑嘉政寄循良遠
路連秋草征衫帶夕陽濟時公等在吾欲泛滄浪

旅次

旅次渾無定生涯亦漫勞病求方士藥寒憶故人袍避
俗惟黃卷忘憂但濁醪柴門多落葉昨夜朔風高

馮延登

雪

屋破寒無那庭空雪已深山川非舊觀松柏見貞心凍

雀爭遺粒棲鴉點暮林攜琴訪溪友清興憶山陰

李俊民

答祁定之韻

黃菊催秋暮青山勸客歸事隨時漸改人與物皆非爽
氣收殘暑閑雲送落暉平生會心侶別後往來稀

游太平泉

稍有林泉興相陪杖屨遊百年人易老千種事堪愁是
處花無主誰家酒可筇芳時好行樂春去不能留

宿夾谷彥實菴

挂名仙籍上晦迹茂林間門外丹河水牆頭明月山境
隨心自遠人與話俱閒應笑紅塵客區區謾往還

河橋成

并序

橋成有日必有佳句寫河上逍遙之興贈子榮及
督役楊成之

預積他山木重新兩岸堤龍依天上卧虹傍水心低不
假鞭秦石何勞立蜀犀落成應有日誰向柱先題

勢截長河浪橫陳百步梁經營方斷手過涉不褰裳漫
惜千金瓠休誇一葦杭西風簫鼓咽奠酒水仙堂

乙未冬至

已應黃宮律初生復卦陽道隨天在北愁與日俱長節
物驚時換年光有底忙浮雲多變態試與問何祥

五哥生日

落落青雲器天然骨骼奇自從懷橘後每恨學書遲同
樂憐荆樹相煎笑豆萁氣豪常自許躍馬是男兒

寒食

為戀風光好那堪節物催事隨浮世往花似去年開莫
灑無家淚須傾有限盃詩人多少興都向醉中來

游青蓮

閒攜方外友同謁梵王宮山吐三更月松搖萬壑風流
年飛鳥過浮世落花空不有歸來興何能見遠公
行處春風惡山中勝槩藏漸佳如蔗尾薄險似羊腸翠
揖雙峰角清臨一水堂夜長僧睡少為我話興亡

過雲中

把酒不成醉出門行路難客愁千里破歸夢五更殘三
仕有何喜一生常鮮歡恨無南去鴈為我報平安

宿海會寺二首

同孫講師明上人趙叔實劉巨濟夜酌

佛堂光未放桑下喚難回是處皆堪歇何山不可開泉
因龍吐出經自兔銜來徑向黃沙過尋僧問劫灰
青山雲水窟杖錫幾時來竹待香嚴擊松經道者栽西
江無水吸震旦忽花開三笑圖中友同傾破戒盃

游碧落

并序

己亥仲夏十有九日平水曹漢卿楊子平本郡李
鑑臣劉濟之君祥姚子昂史遂良同謁治平院與
上人和霽月煮茗道話抵暮而歸

寂歷松間寺臨流勝槩藏斷雲開石壁橫翠爽溪堂謾
興詩情在留連道話長行人貪弔古歸路半斜陽

九里谷

九曲羊腸路千層劒戟山行鈎藤蔓刺坐印石花斑樹

發三春暮雲歸萬壑間相陪林下屐雖倦不知還

陽城懷舊

呈陽敬之燕
子和李文卿

路梗傷時事春歸感物華風波千萬丈煙火兩三家樹
杪失巢燕牆根無主花當年人不見何處是生涯

道塗行處惡故舊別來稀澗口分流水林梢掛落暉好
山留客住幽鳥背人飛門外秋光老征鞍尚不歸

上長平寄楊成之

衰遲長在外矍鑠愧征鞍世路驚心惡天風刮面寒迢

迨人漸遠冉冉歲將殘今夜梅梢月同誰共倚闌

獨坐

地偏無俗客日在掩柴扉暑退閑蒲扇涼生掠葛衣風
高雲散影露下月揚輝獨據胡牀坐心清即道機

乙亥過河

一身長道路四海尚風塵昔作依劉客今為去魯人渡
河年在亥乞酒歲非申別後山中友相逢話又新

中秋對月

雲山懷素隱秋興暫來歸月與人同醉星隨客漸稀入
河蟾不沒遠樹鵲何依浩氣凝光界瑤臺夢欲飛

元夜有感

春城行欲徧百感到愁邊市冷猶燈火人稀尚管絃梅
從今夜落柑憶舊時傳歸去西窗月無情照不眠

自遣

居間聊自適造物果何如生理年年拙交情日日疎吠
猶聞跼犬技可笑黔驢誰識徘徊意西山有舊廬

過星輅

古道開天險危峰拔地形連營南北戍過客短長亭野
燒驚山鬼湖雲掩將星何人弄羌管哀怨不堪聽

元好問

老樹

老樹高留葉寒藤細作花沙平時泊鴈野迴已攢鴉旅
食秋看盡行吟日又斜干戈正飄忽不用苦思家

陽翟道中

長路伶俜裏羈懷蒼莽中千山分晚照萬籟入秋風頻
見參旗縮虛傳朔幕空故園歸未得細問北來鴻

月觀追和鄧州相公席上韻

月觀知名舊池亭發興偏露涼驚夜鶴風細咽秋蟬綠
泛兵廚酒紅依幕府蓮無緣逐清景空羨飲中仙

太室同希顏賦

壯矣崧維嶽盤盤上窈冥中天瞻巨鎮元氣有遺形雨
入秦川黑雲開楚岫青鼇掀一柱在萬古壓坤靈

送登封張令西上

罷縣人稱屈悠悠復此行
渭城秋鴈到秦嶺暮雲平
道路衣從典風塵劍已鳴
山西多俠客莫說是書生

方城道中懷山中幽居

技拙違時用年饑與食謀
江山貧士歎日月賈胡留
楚客頻招隱文園故倦遊
衡門有幽事還我北窗秋

孟州夾灘飲承之御史家

同欽叔作

黃酒禁愁得芳梅發興饒
紛紜聊且置醜磊故須澆
雞

秦成前約干戈有此宵平生楊大理惜不預佳招

雲卿赴召

五日
矣

送曹吉甫兼及通甫

意氣羨君豪憐君屈騎曹安能事筆硯且復混弓刀風
雪貂裘暗關山馬骨高南飛見鴻鴈應為惜哀勞

勝槩

三鄉作

勝槩煙塵外新詩杖屨間偶隨流水去澹與暮雲還吾
道三緘口時情一解顏從今便高卧已負半生閒

少室南原

地僻人煙斷山深鳥語譁清溪鳴石齒暖日長藤芽綠
映高低樹紅迷遠近花林間見雞犬直擬是仙家

聞希顏得英府記室

近得髯參信知從兔苑遊文星映朱邸勝槩減黃樓進
退存中道功名接上流徒懷貢公喜塵土隔瀛洲

落魄

落魄宜多病艱危更百憂雨聲孤館夜草色故園秋行

役魚鱸尾歸期烏白頭中州遂南北殘息付悠悠

長壽新居三首

地古村墟迴川迴縣郭斜蒲池餘老節菊水引新芽卜
築欣成趣歸耕覺有涯迎門顧兒女今日是山家

隱去心初在新朋復此偕荒田歸別業高樹表新齋泉
石深三徑風塵限兩崖青山坐終日無物寄幽懷

昔有姜夫子來家寂寞濱墓田畊已熟碑石字猶新詩
酒娛中歲山林有外臣三生可信否吾亦寄前身

宣和
中姜

夢得處士常隱於此墓碣在焉夢得曾上書仁宗
既老以詩酒自娛碣文說地名白鹿原長壽村也

短日

短日砧聲急重雲鴈影深風霜侵晚節天地入歸心零
落溝中斷酸嘶繫下音五年朝與夕清血幾沾襟

乙亥元日

五十未全老衰容新又新漸稀頭上髮別換鏡中人野
史纔張本山堂未買鄰不成騎瘦馬還更入紅塵

送母受益自潞府歸崧山

薄俗科名賤孤生志願違
正須謀獨往何暇計羣飛
泌水真堪樂荊州況可依
青山吾舊隱此日羨君歸

送楊次公兼簡秦彥容李天成

海國山如染雲堆草易荒
時危頻虎穴路絕更羊腸
弔影雙蓬鬢携家一藥囊
殷勤秦與李無惜借餘光

倪莊中秋

強飯日逾瘦袂衣秋已寒
兒童漫相憶行路豈知難
露氣入茅屋溪聲喧石灘
山中夜來月到曉不曾看

陽興砦

亂石通樵徑重岡擁戍城山川帶淳朴雞犬見昇平
雨爛沙仍軟秋偏氣自清年年避營馬幾向此中行
避騎兵奪馬者多由此路
蘇州入府

送崔振之迎家汴梁

老伴不易得殘年惟有閒桑麻一村落雞犬兩柴關
樊守能供酒周侯許買山從君釣溪上日日望君還

懷粹中

醉解不復寐吟君田舍詩從知石門老未比木菴師日
月淹書尺江山入鬢絲何因重談笑却似少林時

聚仙臺夜飲

永夜留歡席高懷遠市塵月涼衣有露風細酒生鱗鄉
社情親舊仙臺姓氏新殷勤詩卷在長記坐中人

九月晦日王村道中

水涸沙仍濕霜餘草更幽煙光藏落景山骨露清秋坐
食知何益行吟只自愁隨陽見鴻鴈三歎惜淹留

十月四日往關南

行路見新月獨行還獨謠勞生塵袞袞晚色鬢蕭蕭野
曠無遺穗林疎有墮樵回頭麥山嶺更覺馬蹄遙

寄王文德新

沙際春還去雲頭雨不成興來誰共醉事往獨含情紫

邏留行客黃流隔戍城岸花何處在空憶櫂歌聲

孟津時事

清汝風華地平生記此游酒能千日醉春必萬金酬攬

鏡非遲暮逢花儘滯留只應歌笑處偏欠李鄜州

欽叔時赴

鄜州
幕官

和仲梁

林影魚秋薄雲陰帶晚涼
石潭魚近藻沙渚鴈留霜
笑語無長路登臨豈異鄉
一尊堪共醉惜不是重陽

陽泉栖雲道院

方外復方外翛然心迹清
開窗納山影推枕得溪聲
川路遠誰到石田平可畊
霜林不嫌客留看錦崢嶸

九日詠菊

秋菊有何好祇緣風露清花中誰比數霜後獨鮮明九
日惜虛過一尊還自傾今年病居士吟遠更關情

感事

壯事本無取老謀何所成人皆傳已死吾亦厭餘生潦
倒封侯骨淹留混俗情百年堪一笑辛苦惜虛名

同冀文明秀山行

暮景披橫幅山間二老同雲如愁戍苦雪亦笑詩窮古
木凍欲折斷崖行復通從今胡谷夢時到水聲中

庚子三月十日作

殘夢忘書帙餘寒滯酒盃
青銅原嬾照白紵更寬裁
水際時獨往花邊知幾迴
殷勤雙語燕應自謝家來

七月十六日送馮揚善提領關中三教

為愛秦中好西游日苦遲
青雲動高興白首得新知道
在貧何病官閒老更宜
相思詩酒社無計與追隨

八月并州鴈
三鄉時作

八月并州鴈清汾照旅羣
一聲驚晚笛數點入秋雲
滅

沒樓中見哀勞枕畔聞南來還北去無計得隨君

甲寅十二月四日出鎮陽寄宰魯伯

潯水曉光動灞橋詩境同衝寒騎瘦馬認影識衰翁長
路風聲裏孤城雪意中回頭歌笑處淒絕意何窮

送文生西行

今夜東山月隨人知幾程從軍少年事分手故鄉情渭
水風霜早秦川煙樹平相招有仙掌無計與君行

送楊叔能東之相下

海內楊司戶聲名三十秋
文高徒自苦食盡與誰謀
老檜風霜飽芳蘭澗壑幽
東游無可慮敬客有蕭侯

乙卯十一月往鎮州

村靜鳥聲樂山低鴈影遙
野陰時澗朗冷雨只飄蕭
涉遠心先倦衝寒酒易消
紅塵忘南北渺渺見長橋

杜仁傑

禹城道中

自發醯雞覆蓬心得少瘳
乾坤一尺筭今古幾全牛
歲

月憐丹竈雲山笑白頭此生真欲止何地不菟裘

病中枕上

忽忽卧幾月遂成疎懶名却因久病後更覺萬緣輕月
落窗影動夜寒燈暈生狸奴似相慰分坐守殘更

送信雲父

居士身輕日秋天木落時山青雲冉冉川白草離離涉
世心將破懷人鬢已絲相逢琴酒樂應怪久違期

病中憶坦夫兄

共脫壬辰亂他鄉見愈親論才惟有子知己更無人避
世相看老通家未擬貧竹林平日約早晚得為鄰

從軍

野闊牛羊小天低草樹平吳疆連晉境漢卒雜番兵日
合圍城暈風酣戰陣聲中原良苦地上古錯經營

雨中寄高無塵

久客饒孤悶連陰動決旬行雲應已倦細雨亦傷頻飄
泊嗟吾道饑寒任此身人家酒應熟誰為問南鄰

雪後書事

雪罷山原淨日晴風景新一川花氣千萬壑水聲春天
地開華國關河失戰塵無邊春色裏惆悵獨行人

至日

松竹浣花里桑麻杜曲田蒼茫辭蜀地辛苦見秦天死
去誰憐汝生還事偶然但甘終隴畝待聘豈前賢

宿金線泉

官舍值淫雨客衣驚早秋泄雲迷灌木行潦帶清流蛛

網翻新霽蟬聲咽暮愁古今何限事白首對滄洲

中秋夜宿普照喜周卿至

久客厭孤寂楚然聞子來夜涼風縮瑟雲破月徘徊舊
事休重說新詩且細裁幾年無此夕獨欠兩三杯

無題

老淚河源竭憂端秦華齊苦吟知有恨細寫却無題事
與孤鴻北身攜片影西催歸煙樹外不用向人啼

麻革

送李端卿之鄴臺

僮馬戒晨裝新霜木葉黃嗟予無壯節送子慘離腸林
慮荒秋色清漳下夕陽遙知一尊酒弔古鄴城傍

贈王明伯

遼海遺珠在黃華秀未空百年書法裏萬事酒盃中耿
耿此心在悠悠吾道窮好賢明達事獨喜與君同

秋夜感懷

老境歡娛少愁懷感歎長世途多險阻歸興渺蒼茫疎

雨梧桐夜西風蟋蟀牀平明攬清鏡衰鬢又添霜

雲中夜雨

憔悴杜陵客悲涼王仲宣四圍晴立壁一突午無煙病
卧秋風裏夢迴夜雨前聽來情緒惡自語自還憐

渡洛

泉石經行久林丘彌望間溪鳴風蕩水谷暗雨含山淡
淡輕鷗沒飛飛倦鳥還世緣良自苦空羨野雲閒

浩浩

浩浩春風裏悠悠倦客情
天寒花寂寞冰泮水縱橫
念遠心長折聞兵夢亦驚
江山憔悴久倚杖歎餘生

張宇

和劉敏之韻

城居寧不好未易著閒人
客至慙無酒詩成莫療貧
談天雖有口無地可安身
羨殺清江鷺生來不受塵

房皞

寄王文炳

愛客孔文舉能詩陸士衡十年來識面千里飽聞名郁
郁芝蘭秀蕭蕭風露清幾時尊酒畔容我話平生

和楊叔能之字韻

遭亂重相見寬心不用悲江山佳麗地人物太平時白
蟻千家酒黃花九日詩鹿門不可隱吾道欲安之

段克己

方平道中

沙軟新經雨風輕不起塵溪山隨處好花柳著行新放

浪聊終日蹉跎又一春行年已如此猶復向來人
病怯春衫薄衰憐葛屨輕平蕪迷舊迹幽鳥變新聲興
與雲俱遠心同水共清膠膠還擾擾回首笑浮生

微雨後偶成

孤憤憑誰訴長歌聊自怡整衣憐瘦減扶杖覺衰遲小
飲非愁敵輕寒與睡宜今朝春雨好穉子莫啼饑
寂寂春歸後悠悠夢覺時病添花懊惱愁耐酒禁持瓶
貯無多粟囊封有許詩倚牀成獨笑此意幾人知

余僑居龍門山十有餘年封張二子曰從余游而貧又甚焉因寫所懷魚簡二子共成一笑

病久慵增劇途窮事轉迂木魚形共槁錐與地俱無醉語勞揮塵悲歌漫叩壺鮮鮮籬下菊笑汝益羈孤

仲堅見和復用韻以荅

道在山林勝心閒歲月迂家風病更好習氣老難無日力分詩卷生資負酒壺儒冠三十載轉覺此身孤

枕上再賡前韻

幾年成懶散一榻了慵迂詩酒心猶在功名夢亦無雨
來催覓句鳥去勸提壺靜裏那須此應憐客意孤

野步仍用韻示封張二子

散策溪頭路溪回路更迂山隨行處好人似往年無波
靜魚千里天晴春一壺龍門何限景歲晚不相孤

段成已

壽李濟夫

夫子何為者昂藏不入時眼前諸事罷膝下兩兒嬉落

落真難合悠悠聽所之黃花一盃酒歲喜與君持

送王子壽之平遥

卜築謀南邁回轅遽北之有情漸見厚無語只空悲易
忍行時淚難堪別後思明年鴈來日屈指數歸期

曹之謙

懷劉京叔

奕世金蘭契於今只有君英才殊落落餘子謾紛紛一
別幾春草相思空暮雲何時展良覲把酒共論文

宿雲臺觀

趨程疲水路寄宿喜琳宮
蓮嶽三峰對松林一徑通
地偏殘暑失境靜俗塵空
入夜清詩夢山泉落枕中

中條阻雨

行李淹蒲坂歸期念晉州
高峰千葉下寒雨一山秋
澗響頻驚夢蟲聲亂入愁
酒醒孤館裏心折大刀頭

初秋雨後

積雨蕩煩暑迴風吹早涼
老苔翻舊碧病葉墮新黃
久

客應吾道浮生半異鄉
黑貂渾敝盡愁看一開箱

鴈

北塞迎霜雪西風送羽翰
數行天澹澹萬里路漫漫
日落秋聲急江空暮影寒
故人書斷絕矯首望雲端

幽居有感

閒居仍地僻門閉草萊深
車馬無還往詩書有討尋
嚴霜催歲晚破屋覺寒侵
計拙煩新舊誰能數賜金

應州廟學釋奠

夜色齋廚肅秋風殿宇清右文遭聖代備禮引諸生牢
醴嚴三獻豆籩陳兩楹祭餘同飲福旭日樹頭明

送李端卿東行

故人有所適驅馬出東城紅樹添秋色青山滿去程曾
為同省掾偏愴遠離情別後能相憶因風為寄聲


御選金詩卷十

謹案卷九第二十二頁後三行平林半是彛刊本
彛訛重據中州集改

卷十第四頁後四行宜之從弟刊本從訛仲據中
州集改

第五頁前七行有請予歌渭城朝雨者刊本朝訛
煙據全唐詩改





總校官庶吉士臣侍朝

校對官檢討臣蕭九成

謄錄監生臣李本

欽定四庫全書薈要

集部

御選金詩卷十一

十二



詳校官原任主事

臣
李斯咏

欽定四庫全書薈要卷一萬八千三百九十七

朱部

御選金詩卷十一

七言律詩一

蔡松年

師還求歸鎮陽

春風卷甲有歡聲
漸識天公欲諱兵
節物無情新歲換
男兒易老壯心驚
落身世網癡仍絕
挂眼山光計未成
間道恒陽似江國
一官漫學阮東平



初卜潭西新居

喬木千章畫不如白鷗煙雨到江湖誰為求仲營三徑
竊比揚雄有一區故國興亡樹如此他年聲利蔓難圖
屋西便與秋山約莫遣歸來見白頭

寄王仲侯

冰簟風簾千柱宮月華清浸雪芙蓉誰教曉馬三千里
好在行雲第幾峰酒市烏紗懷李白仙人鶴氅看王恭
拍浮花裏知恩否寄與新詩洗醉悰

讀疎詠之安陽對竹二詩懷家山次韻見意

短髮新霜及未侵幾年和月買泉林偶然行李對寒碧
憶得故園驚歲陰枕上秋風吹醉夢門前沙鳥立清深
箇中須著脩脩玉落日微風伴我吟

和子文寒食北潭

夢裏潭光翠欲流何時春水一虛舟吾廬想見扶疎樹
官意渾如浩蕩鷗聞道西山明酒面應無外物到眉頭
別來誰唱驚人句十里珠簾有暮愁

雪晴呈玉堂諸公

雪晴松頂玉欄斑
曉眼清於化鶴山
欲立凍雲搜傑句
却思仙客退清班
羅縐帳底沉香火
蘂蔔花中碧霧鬟
喚取廣寒修月手
月波千丈捲春還

和子文晚望

醉眼郊原感慨生
夕陽長向古今明
高人法士互憎愛
美酒空名誰重輕
二頃只謀他日老
五絃猶喜晚風清
因君欲賦思歸樂
安得穿雲一笛橫

兵府得告將還鎮陽府推官王仲侯以書促余
命駕先寄此詩

老驥心疲十二閑天教洗眼小江山名園無處不宜酒
勝日有朋方解顏老木溪光留月駐禪房竹徑約花關
先憑樂府求風骨或有佳人字玉環

渡混同江

十年八喚清江渡江水江花笑我勞老境歸心質孤月
倦遊陳迹付驚濤兩都絡繹波神肅六合清明斗極高

湖海小臣尸厚祿夢尋煙雨一漁舸

初至遵化

出山風物便清和森木如雲秀靄多白水臨流照疎鬢
青門折柳記柔柯重遊化國驚歲月有象豐年占麥禾
亦有黃公酒壚在微官自要阻山河

黃海棠

清陰不歎晚尋芳縹緲緗雲翠袖長萼綠江花輸帶葉
醉紅蜀豔恨無香南州氣味連三月東晉風流共一觴

老眼寒來易愁絕溫柔乞與醉中鄉

夜坐

吾生有幾事無涯清夜漫漫歎物華但願聞鉦似疲馬
可能黏壁作枯蝸只今雪屋重衾濕去歲梅溪醉帽斜
終得蕭閒對牀語青燈挑盡短檠花

槽聲同彥高賦

槽牀過竹春泉句

聚簷秋雨喧疎溜過竹春泉咽暗冰
門巷蕭條三尺雪琴書寥落一龕燈

彥高詩也他日人云吾亦云自愛淳音含太古誰傳清溜入

南薰秋風幾共橙香
注曉月曾和鶴唳
聞我欲婆娑竹
林國洗空塵耳正湏君

韓侯晁仲許送名酒
渴心生塵以詩促之

好在銀瓶秋露光
借君雲夢到枯腸
解澆萬里客愁破
暫吐十年黃卷香
江水苦搖梁苑夢
海棠新學漢宮粧
天東四月春如許
坐待白衣投醉鄉

吳激

過南湖偶成

杏山松檜紫坡陀
湖面無風亦自波
綠鬢朱顏嗟老矣
落花啼鳥奈春何
詩人未必皆憔悴
世事從來有折磨
列坐流觴能幾日
知誰對酒愛新鶯

長安懷古

佳氣猶能想鬱葱
雲間雙闕峙蒼龍
春風十里灞陵樹
曉月一聲長樂鐘
小苑花開紅漠漠
曲江波漲碧溶溶
眼前疊嶂青如畫
借問南山共幾峰

晚春言懷寄燕中知舊

閒雲洩洩日暉暉
林斧谿春響翠微
天氣乍晴花滿樹
人家久住燕雙飛
隣村社後容賒酒
客舍新來未綻衣
遙憶東郊亭畔柳
歸時相見亦依依

秋夜

豈有涓埃補盛明
強扶衰病厠豪英
夜窗燈火青相對
曉鏡髭鬚白幾莖
年去年來還是夢
江南江北若為情
石田茅舍君家近
借與林泉送此生

宇文虛中

予寫金剛經與王正道正道與朱少章復以詩
來輒次二公韻

平生幸識繫珠衣窮走他鄉未得歸有客為傳祇樹法
此心便息漢陰機百千三昧一門入四十九年諸事非
寄與香山老居士要憑二義發餘輝

次正
道韻

前世曾為粥飯僧此生隨處且騰騰經年因認人我相
教外都忘大小乘寫去欲云居士頌信來如續祖師燈
他年辱贈茅庵句誰謂因緣昔未曾

次少
章韻

郊居

芒屨松冠野外裝
茶鐺藥竈靜中忙
含風荇逐波紋展
著雨花連土氣香
停策仰簷朝覓句
披襟穿樹晚追涼
蓬蒿似欲荒三徑
疎懶誰知意更長

重陽旅中偶記二十年前二詩因而有作

舊日重陽厭旅裝
而今身世更悲涼
愁添白髮先春雪
淚著黃花助晚霜
客館病餘紅日短
家山信斷碧雲長
故人不恨村醪薄
乘興能來共一觴

己丑重陽在劔門梁山鋪

兩年重九皆羈旅萬水千山厭遠遊
白酒黃花聊度日青萍綠綺共忘憂
却憐風雨梁山路不似蓴鱸楚澤秋
何必東皋是三徑此身天地一虛舟

和題稽古軒

堆架鱗紉粲葩居眼前長物埽無餘
避器肯要隣人卜論友先尋上世書
汲古不須憂綆短隨波聊復任舟虛
勿欺丈室纔容膝六合神遊有日車

涇王許以酒餉龍溪老人幾月不至以詩促之

龍溪叔通
別號也

先生寂寞草元丈正要侯巴作富鄰客至但須樽有酒
日高不怕甌生塵急催嶺外傳梅使來餉籬邊采菊人
已埽明窗供點筆為君擬賦洞庭春

從人借琴

嶧陽慣聽鳳雛鳴瀉出冷然萬籟聲已厭笙簧非雅曲
幸從炊爨爨脫餘生昭文不鼓緣何意靖節無絃且寄情

乞與南冠囚繫客為君一奏變春榮

姑蘓滕惇禮榜所居閣曰齋心成都宇文某作
詩以廣其志

不是憑虛避世喧此中於物本無緣
靜看畏影徒勞爾
題作齋心亦且然意識已隨言語斷
生涯聊任歲時遷
老夫未涉天游趣三復南華第四篇

高士談

庚戌元日

舊日屠蘓飲最先而今追想尚依然故人對酒且千里
春色驚心又一年習俗天涯同爆竹風光塞外只寒煙
幾年無復功名望志在蘓君二頃田

次伯堅韻

公道向來惟白髮浮生何處用黃金東風吹散三年恨
春色驚回萬里心急景只教人貌改滄溟不放酒盃深
異時倘及公榮酌準擬歸來卧柳陰

次韻飲巖夫家醉中作

月中招得飲中仙
草露吹風灑淨便
地有溪山真可樂
人如冰雪自無眠
清新李白詩能勝
勃率張憑理最玄
功業本非吾輩事
此身聊復鬪尊前

晚登遼海亭

登臨酒面灑清風
竟日憑闌興未窮
殘色樓臺山向背
夕陽城郭水西東
客情到處身如寄
別恨他時夢可通
自歎不如華表鶴
故鄉長在白雲中

風雨宿江上

風雨蕭蕭作暮寒
半晴煙靄有無間
殘紅一抹沈天日
濕翠千重隔岸山
短髮不羞黃葉亂
寸心常羨白鷗閒
濤聲午夜喧孤枕
夢入瀟湘落木灣

志隱軒

家居瀟灑似江村
花草侵階水映門
元亮結廬山掛眼
孔融好客酒盈尊
肯教軒冕移心志
未厭林泉入夢魂
我亦平生倦遊客
一塵無處問東屯

杜充

塵

汨汨勞生為爾忙，只除不到白雲鄉。
步回洛浦生羅襪，歌斷秦樓落杏梁。
閒撲衣襟迷遠望，靜穿窗隙鎖斜陽。
帝城別有風流在，輦路春風十里香。

邊元鼎

村舍二首

何事區區守一丘，春花過了月明秋。
等閒濁酒籬邊興，寂寞寒花雨裏愁。
不識故人今在否，每思前事隔重遊。

西風又是青山晚落葉無聲水自流
牆外青山半在樓山村晝晚雨脩脩
旃裘擁腫無餘事尊酒飄零又一秋
學得屠龍無用處祇如畫虎反成羞
回頭為向淵魚道鴻鵠而今不願游

出門騎馬

出門騎馬即三千面目塵埃動慘然
生計若為田二頃饑顏翻媿宦三年
乾坤造物能無用富貴由時枉自鞭
達否從今已知計五湖煙裏有漁船

帝城

帝城回想夢魂中秋月春花
在處同朱雀橋南三月草
鳳皇樓上四更風錦囊別後
吟箋少玉笛閒來酒盞空
贏得當時舊標格九分憔悴
入青銅

新香

新香終比舊香濃只是相逢
久不容繡被瞥同巫峽夢
銀鞍多負景陽鐘寶檀煙斷
間金獸玉鎖聲傳惱睡龍
簾影漸分風又起一塘秋水
落芙蓉

聞簫

弄玉吹簫玉琯低秋風散入滿天悲
滄波夜漲龍吟細琪樹霜風鳳嘯遲
漢月有情如靜聽簫郎無路不相知
秦樓虛負清宵意惆悵乘鸞舊有期

和致仕李政奉韻

車馬年年陌路塵安知六驥過窗頻
雲泉是處堪為樂軒冕從來只累人
浮世夢中無限事紅顏花上霎時春
五湖興有扁舟笛好在晴天月一輪

惜春

春來春去惱春晴
花落花開又幾經
夜雨多情愛沾灑
楊花無賴只飄零
每成宴賞須成醉
不恨歸來却恨醒
眼見紅英留不住
綠枝深處一星星

客思

客思逢春易感傷
不堪殘淚愛家鄉
離親恍惚來千里
餬口淒涼在四方
羞向孫劉圖富貴
浪從李杜學文章
官街坐對黃昏月
半屋青燈滿地霜

王文伯還家詩以迎之

陌上東風故國春
瘦驂羸僕倦行塵
十年一夢成何事
千首新詩不負人
重對孤燈聽軟語
遞憐華髮各清貧
西齋煙草應如舊
桃李新蹊滿四鄰

晚行

隔浦行聞晚寺鐘
斷坡寂歷對寒松
蒼煙暮合孤城暗
破月微昏遠岫重
宿翼飛投空自急
斷蓬無計竟何從
新年又入應添歲
歸把青銅怨暮冬

山中

世路風波老不禁一塵歸買就槐陰坐詩為累言難解
因酒成狂病轉深山月荒涼窺斷夢壁燈青點伴微吟
十年積毀應銷骨豈礙孤雲萬里心

新秋示友

一頃山田半已蕪閉門高卧著潛夫不才分作溝中斷
舊好誰瞻屋上烏南阮強須攀北富東丘何用歎西愚
自憐幽默相忘久鬪鳥鳴蟬枉叫呼

偶題二首

當年樂事歎今衰，人世空驚日未移。
風榭醉眠推鳳燭，雨窗狂飲殢蛾眉。
長松茂草窮年事，野水孤村入夢時。
強鑷鬢絲臨晚鏡，瞥然塵念不勝悲。

短髮臨風懶不冠，窪尊塵坐寂無歡。
離騷夕賦醒尤獨，孤憤空書說轉難。
晚節慣成林壑僻，幽居深入水雲寒。
蒼崖瘦柏無窮思，鵠立溪頭盡日看。

新居

鏡裏巖花落澗泉對窗青壁便參天幾當雪月開春酒
時有松風入夜絃遠劖山田多種黍稀經城市少言錢
平生謾忽王侯貴俯仰村鄰更可憐

張斛

南京遇馬丈朝美

浮雲久與故山違茅棟如存尚可依行路相逢初似夢
舊遊重到復疑非滄江萬里悲南渡白髮幾人能北歸
二十年前河上月尊前還共惜清輝

訪香林老

風雨無時浪蹴天南浮舟楫信多艱半生夢破寒江月
萬里春回故國山歸客自傷青鬢改高僧長共白雲閒
誅茅借我溪西地未厭相從水石間

張孝純

中運使寄酒清明日到以詩謝之

芳樽到日恰清明似與嘉辰默計程擬助林園延勝賞
肯容桃李落繁英老來官爵渾無味閒裏杯盤却有情

見說使車臨岱麓
儻能相過共飛觥

馬定國

清平道中

棘林苦苣野花黃
一馬駸駸渡滎陽
別墅酒旗依古柳
點溪花片落新香
伏波事業空歸漢
都護田園不記唐
今日清明過寒食
又將書劔客他鄉

登歷下亭有感

男子當為四海遊
又攜書劔客東州
煙橫北渚芰荷晚

木落南山鴻鴈秋富國桑麻連魯甸用兵形勢接營丘
傷哉不見桓公業千古遼城空水流

題崇子中菴

羨君高節似陶潛五畝園林老不添
遜世人情雖淡薄
開門秋色自清嚴
案頭黃卷香終日
砌下蒼苔雨一簾
後夜中秋更應好
隔窗雲木看飛蟾

送圖南

壺觴送客柳亭東
回首三齊落照中
老去厭陪新客醉

興來多與古人同
戍樓藤角垂新綠
山店梨花落細紅
他日詩名滿江海
薺堂相見兩衰翁

招康元質

此生依著定如何
不傍畊疇即釣蓑
北阜平蕪隨鳥遠
東湖新漲與天多
詩成重墨題飛葉
睡起輕芒踏軟莎
猶有客愁消不盡
風軒茶竈待君過

四月十日遇周永昌

竹裏涓涓雨未晴
日高窗牖受虛明
數家燕雀青雛出

是處園林綠顚成
貧覺酒盃真有味
病思丘壑豈無情
東山舊隱許相過
他日秋原看耦耕

幼時種木已巢鷲
猶向花前作酒顚
郭外青山招曉出
圃中明月照春眠
世無蘓黃六七子
天斷文章三十年
今日逢君如舊識
醉持盃杓望青天

祝簡

舟次丹陽

船頭東下趁晨鐘
船外青霜氣暗通
斷鴈聲歸煙靄裏

孤帆影落月明中
隋河波浪千年急
梁苑池臺一半空
試問碧堤無限柳
敗條衰葉幾秋風

張子羽

壽張和滑益之

理髮秋庭趁夕陽
靜中誰可共傳觴
雲橫故國三年別
水遠孤村六月涼
病眼只貪書味永
渴心頻夢橘奴香
魚山早有終焉計
少日應容解印章

朱之才

暴雨

掣電奔雷晡靄間崩騰白雨襲人寒顏山黑霧傾濃墨
倒海衝風瀉急湍勢似陽侯夸海若聲如項籍破章邯
炎歊一濯須臾耳已看天圍碧玉寬

劉著

次韻王子慎玉田道中一首兼呈韓公美閣老
東晉風流屬子猷開元峭直讓韓休絲綸對掌驚三雋
尊酒更酬失四愁古道陰陰槐樹老歸鴻杳杳荻花秋

浩然詩思天涯遠月滿江南小謝樓

次韻彥高暮春書事

戊申歲

平生漫浪老清暉却埽丘園屬少微
世亂傷心青眼舊天涯流淚白雲飛
羈愁只憶中山酒貧病長懸子夏衣
澤畔行吟誰念我祇應形影自相依

寄題張浩然松雪樓

入座山光秀玉柯岸巾絕景意如何
瘦來豈為寒松句和寡還驚白雪歌
地近雲煙來鶴駕簷高星斗瀉銀河

懸知老子登臨處渺渺滄波月色多

文季侍郎得綠萼香梅子文待制有詩輒亦同
賦

一枝綠萼冠羣芳瀟灑猶疑楚岸傍香骨瘦來冰蕊細
夢魂清處月波涼賡酬便合成千首醒醉寧須計百觴
橫玉叫雲吹不盡只教今古洗離腸

李之翰

題密雲州學壁

崎嶇到此興何堪
況復風謠意未諳
旅舍蕭條空自遣
胸懷磊落向誰談
留連暮雨侵疎牖
宛轉飛雲掃翠嵐
因憶林泉歸去好
一燈幽夢遶春潭

中京遇因長老

天涯流落偶生還
古剎相逢語夜閒
歎我歸途千里遠
喜君禪榻一身安
松聲不斷風吟細
月影無邊露氣寒
分手山堂更寥索
冷雲衰草伴征鞍

歲暮

休怪年來白髮新
天涯三載困埃塵
偶離砂磧窮陰地
收得桑榆老病身
對雪莫吟秦嶺句
撥醅且醉漢江春
此生自斷無餘事
何必區區問大鈞

楊興宗

出劔門

嘔啞鳴鵠下長川
萬疊青峰只眼前
山鷓啄殘紅杏粉
杜鵑啼破綠楊煙
夢回蜀棧雲千片
醉枕巴江月一船
物色誰分杜陵老
風騷牢落劔南天

范曄

和高子初梅

春風也自惜流光只放寒梅一樹芳
玉粉更糝前夜雪口脂猶注昔年香
江湖昨夢誰同記詩酒風流豈易忘
東閣何郎未全老花枝休笑鬢絲長

姚孝錫

睡起

生涯甘分寄畊桑山色圍門水遶牆
困病久懲耽酒癖

愛閒猶有和詩忙
簷冰滴砌春猶冷
野馬浮川日漸長
舊事老年多記憶
故園歸夢正悠颺

柳溪別墅

安車隨意飽甘肥
晚食徐行理亦齊
山市日高人未集
柴門客至鳥先啼
溪橋散望攜筇度
野寺牽吟信筆題
容膝易安聊自適
甕天閒看舞醪雞

歲晚懷二弟

少易成歡老易傷
壯遊垂白未還鄉
煙塵無復音書到

魂夢猶疲道路長
爆竹又驚新薦歲
屠蘇空憶舊傳觴
年年此日遙相憶
鴻鴈何時續斷行

次李平子登臺有感韻

落日孤雲帶遠崗
戍樓煙瘴舊邊場
疲民卒歲方懷土
遠客憑高自憶鄉
漢使一朝延四皓
秦詩千古弔三良
行藏此意無人解
聊借青山送酒觴

九日題峯山

不須歌吹上叢臺
千里晴川入座來
世事難憑休挂口

生涯現在且銜盃無情趁暖花先老有信迎寒鴈已迴
遙想故園親種菊霜枝露蕊向誰開

次韻王無競見寄

客懷重倚仲宣樓白草黃雲塞上秋山色不隨塵世改
水聲還抱故城流隙中畏景那堪玩鏡裏衰顏祇自羞
多媿詩人苦相憶遠傳佳句弔清愁

和成冠卿見寄

別恨頻添鬢雪深百年懷抱鬱沈沈標名不挂金銀榜

涉世空堅鐵石心
俗物何勞供一醉
殘僧正欲伴孤吟
朱絃三弄虛簷寂
唯有清風是賞音

感白髮

彈鋏憑誰聽
客歌震雷那復化
魚拔梳頭白雪驚
新有障眼元花比
舊多鄉問阻兵猶
斷絕羈懷憑酒暫
消磨不須更問今
朝客門外原無雀
可羅

曉霽

一夜雲峯卷
迅雷殘紅狼籍點
蒼苔鷺聲豈解留
春住

燕語虛勞喚夢回
愁寂頓疑詩思減
衰殘偏感歲華催
柳溪魚鳥應相識
乘興無嫌日日来

重九偶成

天邊今日又重陽
隴樹紅飛鴈信霜
且插茱萸慰衰鬢
莫將詩句撓回腸
歌勤皓齒人俱醉
舞戀晴暉蝶也忙
來日預期扶宿酒
未應籬菊減秋香

溪橋早春

輕黃未染柳梢勻
連日溪風卷塞塵
乍暖乍寒花信晚

相呼相應鳥聲頻少勤謾挾經綸策老懶空餘病患身
追憶故園桃李樹年年紅紫為誰新

村居偶成

靜愛柴門野興幽杖藜徐步到巖丘
深林有獸鳥先噪廢圃無人泉自流
土瘠稅租隨力辦年豐禾黍過時收
客來不慮無供給白酒黃雞亦易求

題佛光寺

臧穀雖殊竟兩亡倚闌終日念行藏
已忻境寂洗塵慮

更覺心清聞妙香孤鳥帶煙來遠樹斷雲收雨下斜陽
人間未卜蝸牛舍遠目橫秋益自傷

次韻子才對菊見懷

髮蓬新感二毛侵尚阻清尊對菊斟久擬芝蘭同臭味
莫疑魚鳥自高深食貧豈復甘秦炙客病空懷奏楚音
掛席無由上牛斗漫憑流水送歸心

春日溪橋

留戀春光慰病顏無情風雨卷春還陰陰密綠籠溪暗

細細疎紅點徑斑老去益憐詩思澀
懽來聊破酒腸慳
不嫌門外無車轍得遂衰慵一味閒

登樓有懷

老媿凭闌目力昏百年懷抱向誰論
晴空鴈起雲邊塞
夕照人歸郭外村因記昔遊驚迅晷
暫將離恨付清尊
誰人肯似邊居士遠駕朱輪過雀門

劉彥

秋雨得雲字

一室蕭然半掩門
簷牙懸溜喜初聞
棲鴉不動寒偎樹
過鴈無聲冷貼雲
歷耳半隨風淅瀝
舞階仍帶葉繽紛
隔籬為問東皋叟
薤麥前春定十分

王璫

游太寧寺

西山踏破萬層青
與客攜壺上太寧
泉石有情容避俗
軒裳無術可逃形
雲縈屋角僧禪靜
露下松梢鶴夢醒
明日却尋塵境去
曉猿啼月若為聽

王珣

王元仲海岳樓同諸公賦

十二朱闌倚半空
元龍高卧定誰雄
簷楹翠濕蓬山雨
枕簟涼生弱水風
物色橫陳詩卷裏
雲濤飛動酒盃中
謫仙會有騎鯨便
八極神遊路可通

朱自牧

晉寧感興

莫將官況說葭蘆
一味蕭條稱鄙夫
老圃不禁蔬代肉

樵丁還喜炆連廚兒音半已漸秦晉鄉信無因接魯洙
三見秋風落庭樹年年歸意負尊鱸

年節嵐州席上贈同知王子直中散

別時風雪暗龍津一夢經年復見君去國光陰雖易得
夾河形勢且平分心如征馬常嘶代身伴秋鴻却渡汾
此日一尊難惜醉新年風景舊知聞

送鄜州節判任元老罷任東歸二首

長途冰雪歲崢嶸客裏那堪送客行萬里歸心應接浙

一尊別酒且班荆
春生汶水庭闈近
人去雕陰幕府輕
欲仗征鴻寄消息
地寒不肯過邊城

都騎駸駸指汶陽
關門應識棄繻郎
暮寒煙浪歸期阻
細雨簷花飲興長
束帶暫為彭澤令
曳裾休忤漢梁王
邊城情味君應會
為說無慘與故鄉

小雨不出寧海司理廳

吏散庭空鎖碧苔
冷官門戶幾曾開
疎疎細雨槐花落
寂寂虛堂燕子來
多病始知窮有鬼
獨賢方覺仕無媒

故園拋擲奔馳外剛道江山未放回

過渾源留別田仲祥同知節使

金臺前夢杳無踪一阻雲山莫計重雙鯉附書常不達
兩萍浮海偶相逢燕南落日車分轍代北春風酒滿鍾
明日去留牽世務燈前談笑且從容

訪山寺僧

踏破蒼苔叩竹扃晚晴庭院有餘清幡腰落日紅千颭
簷際遙岑翠一橫種秫公田聊卒歲栽蓮僧社擬投名

從今興熟頻來往未信齋鐘午後鳴

謝吳堡知寨安巨濟贈紙百幅

百幅溪箋遠見羞故人佳餉若為酬
幸將晚節收魚網未得良工起鳳樓
柿葉學書差足慰芸香辟蠹會須求
揮毫不見雲煙落愚賈操金愧暗投

清河道中暮歸

緩轡溪邊喜乍晴夕陽流水浸孤城
川平佛塔層層見浪穩商舟尾尾行
十里煙霞隨野步兩崖禾黍撼秋聲

雨暘雖有豐年兆久客都無地可畊

晚泊濟陽

江北秋陰一半晴晚涼留與客襟清
水邊畫角孤城暮雲底殘陽遠樹明
旅鴈為誰來有信斷蓬如我去無程
寥寥天地誰知己村酒悠然只獨傾

冬日江樓晚望

萬里長空淡落暉歸鴉數盡下樓遲
山如駭浪高低湧天似寒灰黯淡垂
紫塞西橫連統萬黃河東下接汾隄

此邦形勢雄今古只與羈人百不宜

郊行

緩步尋春水一涯最憐朝雨浥輕沙小溪煙重偏宜柳
平野雲垂不礙花青眼步兵原好酒黑頭江令未還家
興長不覺歸來晚過盡城頭陣陣鴉

和郭仲榮郡城秋望

城高野闊思何窮人在西風一笛中樓影不搖溪水淨
春聲相答暮山空海天引望能供碧霜樹經秋更倚紅

回首客魂招不得，尊鱸歸興滿江東。

病起書事

牢落衰年病轉侵，醫編藥裹廢閒吟。
卧銷白日塵凝屢，起對青銅雪滿簪。
霜後癡蠅看老態，天邊倦鳥識歸心。
維摩不出文殊去，門巷蕭條翠蘚深。

李晏

白雲寺

白雲亭上白雲秋，桂棹蘭橈記昔游。
往事已隨流水去，

青山空對夕陽愁興亡翻手成舒卷今古無心自去留
獨倚西風一惆悵數聲柔櫓下汀洲

題武元直赤壁圖

鼎足分來漢祚移阿瞞曾困火船歸一時豪傑成何事
千里江山半落暉雲破小蟾分樹暗夜深孤鶴掠舟飛
夢尋仙老經行處只有當年舊釣磯

潞州形勝

東迎壺口疊羣山吞吐嵐光紫翠間削玉遠排珪首銳

暈痕輕拂黛眉彎五龍飛去松杉老萬井喧囂日月閒
遊客乍醒塵土眼仙局誰指扣元關

遊龍門迴投超化寺

精藍三日飽溪毛俗累紛紛覺可逃採水尋源通月冷
披榛得路接雲高山圍故壘懷千古河轉孤巖激怒濤
回首煙霞應笑我人間官職信徒勞

韓汝嘉

寄元真同年

十年塵土鬢毛斑杖履還來踏故山
葉寄殘紅春尚在雲酣濕翠雨仍慳
不堪倚樹追前事更恐臨溪見病顏
一日暫來千日去何時倦鳥得真還

郭長倩

義師院叢竹

南軒移植自西壇瘦玉亭亭十數竿
得法未應輸老柏植根兼得近幽蘭
雖無穠豔包春色自許貞心老歲寒
百草千花盡零落請君來向此中看

麻東彞

題廣勝寺

盤雲梯石上崇岡殿閣崢嶸古道場寺紀汾陽親奏願
塔傳阿育久騰光簷前山聳千層秀檻外溪分二帶長
種種塵緣都洗盡祇因身在白雲鄉

蔡珪

雪和坡公韻

門外黃昏噪晚鴉
瑤塵細逐九雲車
豐年待作三登兆

暮景重開六出花
濁酒無人同此興
扁舟有客訪誰家
明朝試望東林樹
百尺寒梢倚玉叉

到廣黃河

清漳節物似清江
不復蓴鱸夢故鄉
歷下果能留太白
鏡湖端是屬知章
身隨客路常岑寂
心與沙鷗共渺茫
尚困馬蹄三百里
小舟聊欲過滄浪

登陶唐山寺

嶺外高槐驛路長
嶺頭蕭寺俯朝陽
定知絕頂有佳處

聊與瘦藤尋上方千里好風隨野色一軒空翠聚山光
道人底是憐行役不惜禪牀坐午涼

簡王溫父昆仲

荷鈿小小半溪香槐幄陰陰一畝涼飛絮亂將春色晚
行雲閒屬暮山長求田已喜成三徑適意真堪寄一觴
君是山陰換鵝手可無傑句傲風光

秋日和張溫仲韻二首

琴裏忘憂盡日彈百憂俱息夜初闌青燈把卷逢真味

綠酒傾尊破薄寒
月色半留梧影上
露華應到菊花團
在家須信貧猶好
夢想人間行路難

照水疎林萬木蒼
迎軒爽氣一襟涼
有時獨聽溪舂坐
無事方驚晝景長
雲薄西山聊隱現
煙橫白鳥去微茫
可憐騎省多秋思
拘士安能識大方

和彥及牡丹時方北趨薊門情見乎辭

舊年京國賞春濃
千朶曾開共一叢
好事祇今歸北圃
知音誰與醉東風
臨觴笑我官程遠
賦物輸君句法工

却笑燕城花更晚直應趁得馬家紅

戲楊新城

長短亭中竟日忙解鞍初喜水雲鄉風前列席花鈿秀
雨後行廚杏粥香春色紛紛驚過眼歌聲故故促傳觴
蓬萊殿下同年客定笑狂夫老更狂

和曹景蕭暮春即事

戶部尚書望之

甕頭春色開重耐門外春風改袂衣灼灼向來花又笑
翩翩幾處燕于飛山陰未辨羲之集沂上聊從點也歸

節物驚心遽如許却因觀化識天機

并門無竹舊矣李文饒嘗一植之至今寺僧日
為平安報其難可知已官舍東堂之北種碧蘆
以寄意因作長句

青君那肯顧寒鄉試著葭蘆擬汶篁有若何堪比夫子
虎賁猶想見中郎色添新雨簾櫳好聲入微風枕簟涼
他日東堂慙政拙只將此物當甘棠

春陰

城上春陰暗晚空城頭山色有無中似聞啼鳥來幽樹
已有游絲曳好風流水小橋歸未得落霞孤鶩興無窮
林花不解東君意邀勒遊人未破紅

御選金詩卷十一